

21 қаңтар  
сейсенбі,  
2025 жыл

[uil-gazet@mail.ru](mailto:uil-gazet@mail.ru)

# Ойыл

Газет 1930  
жылдың  
қараша айынан  
бастап шығады

## ҚАҢТАР АУЫП БАРАДЫ ОРТАСЫНАН...

ХАЛЫҚТЫҢ ЖАДЫНДА ҚАҢТАР АЙЫ ҚАҒАРЛЫ АЯЗЫМЕН ЕСТЕ ҚАЛҒАН. БІРАҚ, БИЫЛҒЫ ҚАҢТАР МҮЛДЕМ БӨЛЕК. ШЫБЫНСЫЗ ЖАЗ. АУЫЛДЫҚ ЖЕРЛЕРДЕ МАЛ ӨЛІ ҚОЛҒА ТҮРҒАН ЖОҚ. АУА-РАЙЫН БОЛЖАУШЫЛАРҒА СҮЙЕНСЕК, ОСЫ АПТАНЫҢ ОРТАСЫНДА ЦИКЛОН ӨТЕДІ. АУА ТЕМПЕРАТУРАСЫ 25 ГРАДУСҚА ДЕЙІН ТӨМЕНДЕУІ МҮМКІН. БІЗДІҢ ӨНІР ҮШІН БҮЛ ТЕМПЕРАТУРА «ТРАГЕДИЯ» ЕМЕС... СИНОПТИКТЕР ҰСЫНҒАН МӘЛІМЕТТЕРІНЕ СҮЙЕНСЕК, АҚПАН АЙЫ ДА АСА ҚАТАЛ МІНЕЗ КӨРСЕТПЕЙДІ.



Бірақ, тылсымы терең табиғатқа сенуге де болмайды. Бізді ойылдықтарды алаңдатыны көктемгі келік қатынасы. Өйткені, Ойыл өзені үстіндегі көпір біздің аудан үшін нағыз стратегиялық нысан. Яғни, Ойылдың құрғатамыры.

Сондықтан оның сапалы әрі уақытында аяқталуы – баршамыз үшін аса маңызды. Құрылысы кешеуілдеп, жұмысы көңілді көншітпей отырған көпірдің көктемге дейін бітпесіне көзіміз жетті. Оны жуырда кездескенімізде мердігерлер

де мойындады. Осыған дейін бірнеше мәрте Наурыз айында көпірдің үстінен уақытша өтуге мүмкіндік жасаймыз деп сендіріп келді... Өткен аптада «АМАНАТ» партиясы Ойыл аудандық филиалы жанындағы партиялық

бақылау тобы өткен жылғы су тасқынынан зардап шеккен Ойыл өзеніндегі ауданның бас көпірінің құрылыс жұмыстарына мониторинг жасады. Мониторинг барысында құрылыс алаңында Ақтөбе облыстық жолаушылар көлігі және автомобиль жолдары басқармасының басшысы Айбек Қайыр мен Ойыл ауданы әкімінің орынбасары Нұржау Тұрғамбеков болды. Мониторинг барысында мердігер компания «ТенгизСтройСервисГрупп» ЖШС бас директорының орынбасары Андрей Афанасьев биылғы көктемгі су тасқынына дейін көпірдің құрылысы аяқталмайтынын ашып айтты. Сондай-ақ, мониторинг барысында құрылыс жұмыстарының сапасы, атқарылу мерзімі және тұрғындар тарапынан қойылған сауалдар талқыланды. Партиялық бақылау комиссиясының мүшелері осыған қатысты жауапты өкілдерден нақты ақпарат алды. Көпір құрылысын жүргізуді «ТенгизСтройСервисГрупп» ЖШС өз міндетіне алған. Бұл жобаға 4,073 млрд теңге көлемінде бастапқы қаражат қарастырылып отыр.

Серікбай ҚОЙБАҒАРОВ,  
Ойыл селосы.

## «ТАЗА ҚАЗАҚСТАН» АКЦИЯСЫ ҚЫСТА ДА МАҢЫЗДЫ



Мемлекет басшысы Қасым-Жомарт Тоқаевтың «Әділетті Қазақстан: заң мен тәртіп, экономикалық өсім, қоғамдық оптимизм» атты Қазақстан халқына Жолдауында бірқатар салаларға тоқталып Президент өзінің тікелей бастамасымен іске асып жатқан – «Таза Қазақстан» республикалық экологиялық акциясын өткізудің мән-маңызына ерекше атап өтті. Бұл акция біздің ауданымызда да жалғасын тауып келеді. Сенбілікті Ойыл аудандық жастар ресурстық орталығы қолға алып, оған ауданның белсенді жастары қатысып қолдау көрсетті. Акция барысында Ойыл аудандық аурухана қызметкерлері, аудандық мәдениет үйі, балалар-жасөспірімдер спорт мектебі және Ш.Бекмұхамбетова атындағы мектеп-гимназиясының оқушылары бірлесіп, ауданның көрікті орындарының бірі — Даңқ саябағын қардан тазартты. Белсенділер саябақты тәртіпке келтіріп, қоғамдық орынның өсемдігін арттыруға өз үлестерін қосты. Экологиялық акцияға қатысушылар қоршаған орта тазалығын сақтаудың маңыздылығын мен қатар мұндай игі шаралардың қоғам үшін қажеттілігін көрсетті. Алдағы уақытта аудан жастары осындай экологиялық бастамаларды жалғастыруға ниетті. Ауызбіршілік пен еңбекқорлықты ұрандарына айналдырған жастар аудан көлемінде көпке үлгі боларлық шараларды одан әрі жалғастырмақ.

### ӘКІМ САЙЛАУЫ-2025

#### ОЙЫЛ АУДАНЫ ОЙЫЛ ЖӘНЕ Ш.БЕРСИЕВ АТЫНДАҒЫ АУЫЛДЫҚ ОКРУГТЕР ӘКІМДЕРІНІҢ САЙЛАУЫ 2025 ЖЫЛҒЫ 2 АҚПАН АУДАНЫ АУМАҚТЫҚ САЙЛАУ КОМИССИЯСЫНЫҢ ХАБАРЫ

##### Құрметті сайлаушылар!

Ойыл аудандық аумақтық сайлау комиссиясы Қазақстан Республикасының «Қазақстан Республикасындағы сайлау туралы» Конституциялық заңының 38-бабының 2-тармағына сәйкес 2025 жылғы 2 ақпанға тағайындалған Ойыл ауданы Ойыл және Ш.Берсиев атындағы ауылдық округтер әкімдерінің сайлауында аталған округтер сайлаушыларының дауыс беруі таңертеңгі сағат 7.00-де басталып, кешкі сағат 20.00-ге дейін төмендегі мекенжайларда орналасқан сайлау учаскелерінде өтетінін хабарлайды:

Қ/С	Сайлау учаскесінің нөмірі	Сайлау учаскелерінің орналасқан орны және байланыс телефондары
1	№ 389	Ойыл ауылы, Көкжар көшесі 68, «Ойыл аудандық мәдениет үйі» КММ ғимараты, телефон: 8 (71332) 2-18-99
2	№ 390	Ойыл ауылы, Құрманов Исламғали көшесі 86, «Ж.Жүсіалиев атындағы Ойыл қазақ орта мектебі» КММ ғимараты, телефон: 8 (71332) 2-17-30
3	№391	Ойыл ауылы, Шернияз Жарылғасұлы көшесі 36, «Шұғыла» мәдениет және демалыс орталығы ғимараты, телефон: 8 (71332) 2-20-14
4	№392	Ойыл ауылы, Аманкелді көшесі 2, «Ойыл қазақ орта мектебі» КММ ғимараты, телефон: 8 (71332) 2-16-52
5	№568	Ойыл ауылы, Алтынсарин көшесі 19, «Ойыл денешынықтыру-сауықтыру кешені» КММ ғимараты, телефон: 8 (71332) 72-0-09
6	№394	Қаракөмер ауылы, Достық көшесі 3, «Қаракөмер ауылдық клубы» ғимараты, телефон: 8 (71332) 73-2-00
7	№395	Ақшатау ауылы, Ақжол көшесі 1а, «Ақшатау орта мектебі» КММ ғимараты, телефон: 8 (71332) 72-0-81
8	№396	Құмжарған ауылы, Республика көшесі 23, «Құмжарған ауылдық клубы» ғимараты, телефон: 8 (71332) 73-2-49
9	№397	Қаратал ауылы, Ж.Жүсіалиев көшесі 2, «Ш.Берсиев атындағы орта мектеп» КММ ғимараты, телефон: 8 (71332) 73-0-92
10	№398	Қарасу ауылы, А.Жұбанов көшесі 5, «Құрманов бастауыш мектебі» КММ ғимараты, телефон: 8 (71332) 73-2-28

## ТӘРБИЕ ТАЛ БЕСІКТЕН БАСТАЛАДЫ!

ҰЛТ БОЛЫП ҰЙЫСУ СҮРЛЕУІНЕ ТҮСКЕН ӨРБІР ҚАУЫМНЫҢ ТҰРАҚТЫ ЖЕРІ, ТАРИХЫ, ТІЛІ МЕН ДӘСТҮРІ БОЛУЫ КЕРЕК ЕКЕНІН ЗАМАННЫҢ ӨЗІ-АҚ ДӘЛІЛДЕП КЕЛЕДІ. ОСЫ ТӘРБИЕ ТАҒЫЛЫМДАРЫ ӨН БОЙЫНАН ТАБЫЛМАҒАН КЕЙБІР ҰЛТТАР МЕН ҰЛЫСТАРДЫҢ ТІПТІ ЖАҒАН КАРТАСЫНАН ЖОЙЫЛЫП ТА КЕТІП ЖАТҚАНЫН ТАРҒЫЛ ТАРИХТЫҢ ПАРАҚТАРЫНАН ОҚЫП ЖҮРМІЗ.

Бұл нені білдіреді? Бұл дегеніңіз, әр ұлттың қалыптасуының, дамуының басты алғышарттары деген сөз. Қазақ халқының да ата-бабасынан аманатталып, төніне төбөрік боп дарыған сондай әдет-ғұрып, салт-дәстүрлері жетерлік. Осы ұлы құндылықтардың арқасында қаймана қазақтың бармақ бағы еселеніп, атар таңы арайланып келе жатқаны жасырын емес. Бізді ұлт ретінде ұстап тұрған алтын темірқазығымыз да міне осылар. Осы құндылықтармен құндақталған ұрпақ – ұлттық тәрбиенің, ұлт болмысының қадір-қасиетіне жететіні сөзсіз. Қыз ұзатып, келін түсіру, құда шақыру дәстүрлеріміздің ағайынның арасын жақындатуға, туыстық тұғырымызды нықтауға негізделгенінен естен шығармаған жөн. Жаратушының қасиеті сөзінде: «Сондай-ақ бір-бірлеріңді тануларың үшін сендерді ұлттар, рулар қылдық» - дейді. Осыдан-ақ Ислам дінінің адамның абыройы мен ар-ожданың бәрінен де биік қоятынын, отбасы мен қоғам бірлігін сақтайтынын, әлеуметтік әділеттілікті көздейтінін аңғарамыз. Ал біз өз кезегімізде адамгершілік қағидаларға негізделген хақ дініміз бен біздің ата-дәстүрлеріміз сабақтасып жатқанын жеткізгіміз келеді. Бұлай деп ой қорытуымыздың себебі – біздің ұлттық дәстүрлеріміздің дінмен тамаша үйлесім табуы арқылы саналы әрі тәрбиелі ұрпақ қалыптастыруда ерекше рөлге ие болуында. «Тәрбие – ана құрсағынан



басталады» тұжырымға тұздық ретінде: бала дүниеге келе салысымен болатын «Сүйінші сұрау», «Азан шақырып ат қою», «Шілдеhana тойы», «Бесікке салу», «Қырқынан шығару» сынды өзіндік тәрбиелік мән-мағынасы бар ғұрыптарымызды қоспасқа тағы болмайды. Бүгінде жалпақ мәшһүрдің жартысы мойындаған көшпелі мәдениеттің әлемдік өркениеттегі ықпалы жайлы ойласақ, қазақ халқының ұлттық ұстанымы, танымы-түсінігі, салт-дәстүрлері – замана көші мен уақыт тезінен өткен өмір сүру қағидалары екенін лажысыз мойындаймыз. Біз көбіне ұрпақ тәрбиесі қазақы менталитетте болуына қырық қарайтын сияқтымыз.

Яки еліктеушіліктің ермегіне еріп кеткенбіз бе деген ойға қаламын. Бала тәрбиелеуде ең бірінші туған тілі мен дәстүріне сүйене отырып тәрбиелеуіміз керек. Өйткені, ұрпақ тәрбиесіндегі ежелден қалыптасқан халқымыздың салт-дәстүрлері мен тағылымдарын өнеге тұтпай тұрып, жастарды ұлтын сүюге, ұлтжандылыққа, ізгілік пен парасаттылыққа баулу өсте мүмкін емес. Өз халқының табиғи мінезін бойына сіңіріп өскен әрбір ұрпақ ана тілінің де қадіріне жетері сөзсіз. Халық аңыз әңгімелері, ертегілер, шешендік сөздер, тарихи мәні зор батырлық, ғашықтық, эпостық жырлар жасөспірім баланың таным-түсінігіне әсер ететіні ақиқат. Ол оның

өнерге деген сезімін оятады, құштарлығын арттырады, жақсылыққа, ізгілікке, парасаттылыққа тәрбиелейді. Жаһандану үрдісіне өзінің ұлттық менталитетін, салт-дәстүр, әдет-ғұрпын, тілін, ділін сақтай білген халық қана төтеп бере алады. Сайып келгенде, «Тәрбиелеу дегеніміз – халықтың бойына білімге негізделген этикалық ізгіліктер мен өнерлерді дарыту» деген түсінік қой. Міне сондықтан да, естілердің сөзін ескеріп өскен, ұлтты рухы өн бойында жалындап тұрған ұрпақты тәрбиелеу – сіз бен біздің парасатты парызымыз екенін ұмытпасақ жарар еді...

Асхат ҚАНАЙҰЛЫ,  
Абай аудандық мешітінің  
имамы.





